



Concello da Coruña

BASES REGULADORAS DA CONVOCATORIA DE ASIGNACIÓN DE USOS DAS INSTALACIÓNS DEPORTIVAS MUNICIPAIS PARA ACTIVIDADES DEPORTIVAS DE ADESTRAMENTO DURANTE A TEMPADA 2026-27

1. OBXECTO

Estas bases teñen por obxecto regular as condicións polas que a Concellaría de Deportes vai proceder ao reparto das horas de uso das instalacións deportivas municipais, xa sexan instalacións propias ou cedidas ao Concello da Coruña mediante un convenio, para a realización de actividade deportiva de adestramento, por parte das entidades detalladas no punto 2 que desexen solicitar horas para ese fin.

Debido a que na cidade da Coruña hai un número elevado de entidades deportivas que non dispoñen de instalacións para realizar os seus adestramentos, a Concellaría de Deportes pretende realizar un reparto do uso das horas libres semanais nas ditas instalacións entre todas as entidades deportivas interesadas. Para iso, realízase esta convocatoria, baseada nun procedemento de concorrência competitiva.

Corresponde ao Concello da Coruña, a través da Concellaría de Deportes, a promoción do deporte e a utilización das instalacións deportivas, como así establece entre as súas competencias propias a Lei 7/1985, de 2 de abril, Reguladora das Bases do Réxime Local, no seu artigo 25.2. A mesma competencia está recoñecida para os municipios na Lei 5/1997, do 22 de xullo, de Administración Local de Galicia. A súa vez, a Lei 3/2012, do 21 de abril, do Deporte de Galicia establece no seu artigo 8 entre as competencias dos municipios:

- Fomentar, promover e difundir o deporte, especialmente en idade escolar.
- Construír, xestionar, ampliar e manter as instalacións deportivas de titularidade municipal, e no seu caso, a xestión e mantemento das de titularidade autonómica cuxo uso e xestión lle sexan cedidas.
- Velar pola plena utilización das instalacións deportivas da súa titularidade, procurar a participación das asociacións deportivas do seu ámbito municipal na optimización do uso destas e coidar a súa debida hixiene e seguridade.

En base ás devanditas competencias, a Concellaría de Deportes é responsable de optimizar ao máximo o uso das instalacións deportivas municipais de tal forma que, no caso de que queden horas libres que non vaian ser utilizadas pola dita Concellaría de forma directa, deberá asegurarse o maior uso deportivo posible das instalacións por parte da cidadanía e entidades.

A gran demanda destas instalacións dá lugar a que sexa necesario aprobar estas bases e regular de forma ordenada o procedemento de solicitude das instalacións, así como a prelación do reparto das horas semanais dispoñibles.

Non se ofertarán as horas das instalacións que sexan necesarias para a realización de competicións. No caso de que durante a tempada 2026-2027 deban realizarse competicións en horas que lle están asignadas a calquera dos suxeitos beneficiarios desta convocatoria, deberán deixar as horas libres para realizar as competicións sen ter dereito a ningún tipo de compensación.

2. SUXEITOS

Poderán solicitar mediante este procedemento o uso das instalacións deportivas municipais os seguintes suxeitos:



Concello da Coruña

- a. Entidades deportivas con sede social na cidade da Coruña, definidas polo artigo 40 da Lei do Deporte de Galicia: clubs deportivos, agrupacións deportivas escolares, seccións deportivas e federacións deportivas, todas elas sen ánimo de lucro.
- b. Deportistas individuais con licenza federativa empadroados na cidade da Coruña que precisen das instalacións deportivas municipais para realizar adestramentos. Considérase deportista individual aquela persoa que practique unha modalidade deportiva de carácter individual. Ten a consideración de deporte individual a modalidade deportiva que sexa practicada por un ou dous deportistas como máximo en función do seu regulamento.
- c. Sociedades Anónimas Deportivas con sede social na cidade da Coruña, sempre e cando non dispoñan dunha instalación propia ou cedida para adestramentos e realicen as súas competicións na cidade da Coruña.

3. RÉXIME XURÍDICO E NORMATIVA APLICABLE

Tanto o reparto de horas como o uso das instalacións deportivas municipais deberá realizarse respectando as Bases reguladoras desta convocatoria e, en todo caso a normativa vixente:

- Lei 7/1985, do 2 de abril, reguladora das bases do réxime local.
- Real Decreto 1372/1986, do 13 de xuño, polo que se aproba o regulamento de bens das entidades locais.
- Lei 5/1997, de 22 de xullo, da administración local de Galicia.
- Lei 33/2003, del 3 de novembro, de patrimonio das administracións públicas.
- Lei 3/2012, de 2 de abril, do deporte de Galicia.
- Lei 10/2017, do 27 de decembro, de espectáculos públicos e actividades recreativas de Galicia.
- Ordenanza Fiscal núm. 15 do Concello da Coruña, reguladora da taxa pola prestación de servizos e polo uso das instalacións deportivas municipais.
- Normativa de uso das instalacións deportivas municipais aprobadas pola Xunta de Goberno Local 20 de xullo de 2007.
- Para o caso das instalacións cedidas pola Universidade da Coruña e a Deputación da Coruña ao Concello da Coruña deberán respectarse as normas de uso propias desas instalacións.

4. INSTALACIÓNS OBXECTO DA CONVOCATORIA

No Anexo I que se achega con estas Bases inclúese unha táboa na que se enumeran todas as instalacións deportivas municipais co seu horario de apertura, onde se permitirán realizar adestramentos. Como norma xeral distribuiranse horas de luns a venres entre as horas que non estean reservadas pola Concellaría de Deportes. Sempre e cando exista dispoñibilidade de uso, en determinadas instalacións poderanse ofertar ademais horas en sábados e domingos.

Nas devanditas instalacións existen na actualidade horas dispoñibles que se poden ofertar para uso deportivo. Non obstante, a dispoñibilidade pode cambiar ao longo do ano para aumentar a oferta de programación propia ou ben para dar cobertura a competicións deportivas que se teñan que realizar nas instalacións. Do mesmo xeito poderase limitar o



Concello da Coruña

uso das instalacións concedidas de forma temporal como consecuencia da realización de obras, por motivos sanitarios ou realización de eventos municipais.

A Concellaría de Deportes propondrá de xeito motivado a desestimación daquelas solicitudes que pretendan levar a cabo a práctica de modalidades deportivas que tecnicamente non sexan axeitadas ás instalacións deportivas recollidas no Anexo I. Con todo, a propia Concellaría desestimará as solicitudes de uso daquelas instalacións que polas súas características particulares, entrañen riscos ou molestias a outras persoas, sexan deportistas ou usuarias das instalacións.

5. REQUISITOS PARA PARTICIPAR NO PROCEDEMENTO

Deberán cumprirse os seguintes requisitos:

- a. Que se pretendan realizar actividades deportivas de adestramento cuxo principal obxectivo é a participación e/ou consecución dun resultado deportivo en competicións desenvolvidas no ámbito federativo ou nas competicións recoñecidas pola Administración Deportiva.

Non se concederán horas para equipos ou deportistas individuais que non estean destinados a adestramentos para competición, nin se terán en conta para o cálculo da puntuación establecida no baremo.

- b. Que a actividade se realice por unha entidade que se corresponda con calquera dos suxeitos descritos no apartado 1 destas bases e cuxo adestramento e/ou competicións teñan como sede esta cidade.
- c. Que as entidades deportivas ou SAD que participen en ligas profesionais de ámbito nacional debido ao recoñecemento que iso implica para a cidade da Coruña, realicen a maior parte das súas competicións na instalación que solicita para o adestramento
- d. Na data da proposta de resolución as entidades solicitantes deberán estar inscritas (ou en trámite de inscrición) no REMAC cos datos actualizados. A inscrición no REMAC será comprobada antes da proposta de resolución definitiva.

No caso de que se presente algunha entidade que non cumpra os requisitos anteriores poderá excluírse directamente do procedemento e as horas propostas inicialmente para esa entidade serán ofertadas entre os demais solicitantes.

6. CRITERIOS DE REPARTO

O reparto de horas de uso de cada instalación deportiva farase en base aos seguintes criterios:

- a. Como norma xeral prima a regra de que todos os clubs e entidades deportivas con sede social ou delegación na cidade da Coruña deberían obter como mínimo 1 hora para adestramentos. Se fose necesario, co fin de cumprir con esta regra, a Concellaría poderá dividir instalacións deportivas e modificar o Anexo I para realizar o reparto.
- b. No caso de que fose necesario, a Concellaría poderá propoñer concederlle horas a unha entidade deportiva fora do horario solicitado.
- c. Asignaráselle horas a unha entidade sempre e cando as solicite para o adestramento dun deporte permitido nesa instalación e que ademais coincida co obxecto polo que está constituído o club ou entidade.
- d. Tratarase de asignar tantas horas como sexa posible dentro das solicitadas. O número de horas asignado poderá ser inferior no caso de que haxa moitas solicitudes para ese



Concello da Coruña

mesmo horario. Nese caso haberá que atender aos criterios de baremo e ao acordado pola Concellaría.

- e. A asignación das horas de uso por parte da Concellaría poderase facer atendendo ao nivel e requisitos da competición, así como á representación que supón para o Concello da Coruña.
- f. No caso de que haxa dúas ou mais solicitudes coa mesma preferencia, asignaranse as horas intentando conseguir equidade entre as entidades solicitantes.
- g. Poderase realizar un cálculo proporcional para repartir as horas entre unha ou varias entidades tomando como referencia o número de licenzas presentadas o número de horas dispoñibles nas que existe conflito.
- h. Ás entidades que non viran atendidas a totalidade das horas solicitadas, ofreceránselles horas noutras instalacións similares sempre e cando existan franxas horarias libres.
- i. Para a distribución das horas, teranse en conta o número de faltas de asistencia non xustificadas da tempada anterior (2025-26), co fin de redistribuír os espazos entre as entidades que teñan unha necesidade real de instalacións deportivas. Por normal xeral, non se volverán a conceder á mesma entidade aquelas franxas nas que non asistiu de forma continuada sen xustificación, e ademais descontaranse do baremo as ditas horas.

7. BAREMO

7.1 En función do número total de licenzas federativas que participen en competición oficial

Outorgaranse 0,05 puntos por cada licenza federativa debidamente acreditada, ata un máximo de 40 puntos.

7.2 En función do número de licenzas federativas femininas que participen en competición oficial

Outorgaranse 0,02 puntos por cada licenza feminina federativa debidamente acreditada, ata un máximo de 20 puntos.

7.3 En función das licenzas federativas de menores de idade que participen en competición oficial

Outorgaranse 0,02 puntos por cada licenza de menores federativa debidamente acreditada, ata un máximo de 20 puntos.

7.4 Número de horas non xustificadas na tempada anterior

Descontarase 1 punto por cada hora non xustificada na tempada anterior.

Nota: as licenzas federativas que se terán en conta son as que teñan en vigor á data de presentación do formulario.

8. PUNTUACIÓN EN CASO DE EMPATE

Os empates serán resoltos pola Concellaría de Deportes de xeito que causen o menor prexuízo ás entidades.



Concello da Coruña

9. PROCEDEMENTO

O procedemento polo que se lle distribuirán as horas de utilización privativa das instalacións deportivas municipais ás entidades solicitantes garantirá o reparto mais equitativo posible entre os/as solicitantes que presenten características similares.

A instrución do procedemento corresponderalle ao Servizo Municipal de Deportes (SMD), e a resolución ao Concelleiro de Deportes, por delegación de Alcaldía.

9.1 Presentación de solicitudes e prazo

As entidades deberán solicitar as instalacións e horarios que se axusten ás súas necesidades, atendendo á modalidade deportiva que se pode practicar en cada instalación e ao horario de apertura das mesmas.

As solicitudes presentaranse unicamente a través dun procedemento específico na Sede Electrónica no apartado correspondente á Convocatoria de Usos das Instalacións Deportivas Municipais, no prazo de DEZ (10) DÍAS HÁBILES desde o día seguinte á publicación da convocatoria na páxina web municipal de Deportes.

Cubrirase unha solicitude xenérica onde se indicarán todos os datos solicitados para dar paso a achega da documentación seguinte:

- a. Formulario específico de solicitude.
- b. Certificado acreditativo do número de licenzas federativas emitidas pola federación correspondente, onde deberá distinguirse entre número total de licenzas, número de licenzas de menores, número de licenzas femininas e o nivel das competicións.
- c. No suposto de non estar inscrita no REMAC deberá acreditar que a súa inscrición está en proceso de trámite.
- d. No caso de que se vaian realizar adestramentos con persoas menores de idade deberán declarar responsablemente que están en posesión da certificación negativa do Rexistro Central de delinquentes sexuais, conforme a Lei 26/2015, de 28 de xullo, (BOE 29-7-2015).
- e. Declaración responsable acreditativa de:
 - Posesión dunha póliza de responsabilidade civil actualizada ao período de uso, actividade e instalación; nos termos esixidos no art. 8 e disposición transitoria terceira da Lei 10/2017, de 27 de decembro, de espectáculos públicos e actividades recreativas de Galicia, e art. 23 da Lei 3/2017 do deporte en Galicia.
 - Que todas as persoas participantes (incluídas as aspirantes ou en período de proba) dispoñen de licenza federativa e/ou a necesaria póliza de accidentes que garanta a asistencia sanitaria en dita actividade e coa mesma cobertura que se de licenza federativa se tratase ás persoas participantes que non estean federadas.
- f. Relación de persoal (adestradores/as, coordinadores/as ou persoal de apoio) da entidade que utiliza as instalacións deportivas municipais e declaración responsable de que posúen a licenza federativa.
- g. No caso de ter persoal con contrato laboral, declaración responsable de que se encontran de alta na Seguridade Social.

No caso de que nalgún momento do procedemento se observe que se achegaron datos falsos co fin de obter un maior número de horas, a Concellaría de Deportes poderá revogar o uso outorgado inicialmente.



Concello da Coruña

No caso de que no transcurso do procedemento se dean circunstancias que alteren os datos facilitados, a entidade debe poñelo en coñecemento da Concellaría de Deportes o antes posible, coa fin de poder valorar a modificación dos usos concedidos.

9.2 Requirimento de documentación

Logo de finalizar o prazo de presentación, publicarase a listaxe cos datos extraídos das solicitudes na páxina web de Deportes e revisadas as solicitudes poderase requirir documentación nun prazo de 5 días hábiles.

9.3 Resolución provisional

Unha vez pechado o prazo e recibidas todas as solicitudes, realizarase unha valoración das mesmas e formularase unha proposta de resolución provisional coa asignación de horas de uso.

A valoración será realizada pola Concellaría a cal deberá atender aos criterios establecidos nos puntos 7 e 8 para realizar a súa proposta de asignación de horas de uso.

9.4 Publicación da proposta de resolución provisional, alegacións e presentación de documentación

A proposta de resolución provisional pola que se distribúen as horas de uso das instalacións deportivas será publicada para coñecemento xeral na páxina web de Deportes (www.coruna.gal/deportes), no taboleiro de edictos do Concello da Coruña, e nos taboleiros de anuncios da Concellaría Deportes (Palacio dos Deportes de Riazor, Cidade Deportiva da Torre Arsenio Iglesias e Polideportivo do Barrio das Flores) e no teléfono de información gratuíta 010.

Contra a proposta de resolución provisional poderanse interpoñer as alegacións que se estime oportunas no prazo de 5 días hábiles que se contarán a partir do día seguinte ao de publicación da resolución.

As alegacións deberán presentarse por Sede Electrónica do Concello da Coruña.

9.5 Resolución definitiva

Valoradas as alegacións, se publicará a resolución definitiva. En tanto non se resolva o procedemento, continuarán os usos de instalacións deportivas que estiveran vixente ata ese momento.

9.6 Recursos

A resolución do procedemento poñerá fin á vía administrativa e contra a mesma poderá interpoñerse dende a data da súa publicación, no prazo dun mes, o recurso potestativo de reposición, ou, no prazo de dous meses, o recurso contencioso administrativo.

10. RÉXIME DOS USOS CONCEDIDOS E NORMAS DE USO

- A administración municipal quedará facultada para a modificación ou suspensión puntual dos usos finalmente adxudicados en función das necesidades da Concellaría de Deportes ou, no seu caso, da Universidade da Coruña e da Deputación da Coruña, sen que a entidade afectada teña dereito a ningunha compensación.



Concello da Coruña

A Concellaría de Deportes notificaralle tal circunstancia á entidade que teña concedidos eses usos ao correo electrónico facilitado na súa solicitude cunha antelación mínima de dous días, sempre que sexa posible, e indicarlle o motivo da suspensión.

No caso de que sexa necesario realizar calquera modificación da resolución definitiva dítarase outra resolución motivada que lle será notificada á entidade interesada.

- b. A distribución dos usos para adestramento non faculta á entidade para poder realizar unha competición deportiva dentro dos días e horarios asignados. No caso de que se teña que realizar unha competición deportiva deberá solicitalo con antelación suficiente ante a Concellaría de Deportes presentando a correspondente solicitude por rexistro.
- c. Os usos concedidos estenderanse desde o 31 de agosto de 2026 (ou data da resolución, se esta fose posterior) ao 30 de xuño de 2027. Exclúense as seguintes datas: do 21 de decembro ao 7 de xaneiro, ambos incluídos, e os meses de xullo e agosto; con excepción dos calendarios oficiais de competición. Os interesados que precisasen usos nestes períodos excluídos deberán solicitar tales usos, de xeito expreso e xustificado, por rexistro de entrada e coa debida antelación; as solicitudes poderán ser desestimadas de xeito motivado. No caso de que varias entidades pidan o mesmo, aplicaranse os criterios de preferencia previstos nas presentes bases.
- d. Os usos concedidos non serán de aplicación nos días festivos, en consecuencia, as entidades que desexen adestrar nos mesmos deberán solicitalo por rexistro.
- e. Cando o beneficiario resultase ser unha asociación representativa doutras entidades, na repartición de tales usos entre os seus asociados deberá darlle preferencia a aquelas instalacións que están a pedir e, en igualdade de condicións, primarase o asociado que teña un maior número de deportistas en activo. Intentarase primar, sempre que sexa posible e en coordinación coa asociación, a proximidade da instalación á sede do asociado.
- f. Os usos das instalacións deportivas farase nas condicións fixadas pola presente convocatoria e a resolución da mesma, así como na Normativa de uso das instalacións deportivas municipais aprobadas pola Xunta de Goberno Local 20 de xullo de 2007.

En consecuencia, calquera uso diferente ao concedido ou a modificación deste deberá ser formalmente solicitado pola entidade interesada, e a concelleiro/a delegado/a competente resolverao.

- g. Os adxudicatarios obríganse a utilizar as instalacións nos termos que lle foron concedidos. No caso de que non poidan utilizar a instalación de forma temporal deberán comunicalo ante a Concellaría de Deportes, a cal estará facultada para ofertar as horas que non se van usar de forma libre.

A comunicación do cese temporal do uso das instalacións deportivas deberá facerse cunha antelación mínima de 2 días hábiles. Dita comunicación deberá facerse por Sede Electrónica, indicando no asunto o cesamento do uso das instalacións, o período de tempo e o motivo.

No caso de que non se realice esta comunicación, a Concellaría de Deportes poderá considerar que non se está a utilizar a instalación sen causa xustificada e poderá ditar unha resolución onde a entidade perda o dereito ao uso da instalación.



Concello da Coruña

A realización de competicións fóra da cidade que coincidan coas horas de uso será causa xustificada para a non utilización sempre e cando se comunique coa antelación suficiente ante a Concellaría de Deportes.

- h. A Concellaría de Deportes levará un control exhaustivo do uso das instalacións deportivas municipais por parte das entidades que o teñen concedido. Dito control realizarase polo persoal de conserxería de cada instalación e será anotado no programa informático de xestión de accesos.

No caso de que se produza infrautilización das instalacións por parte das entidades sen causa xustificada, procederase á revogación directa do uso concedido.

Considerarase que existe infrautilización dunha instalación nos seguintes casos:

- No caso de deportistas individuais: cando deportista e adestrador/a falten aos adestramentos na instalación 3 días sen xustificación.
- No caso de equipos: cando equipo e adestrador falten aos adestramentos na instalación 3 días sen xustificación ou non acuda ao adestramento o 60% do equipo sen causa xustificada.
- En calquera dos dous casos anteriores, cando equipo e adestrador falten aos adestramentos na instalación máis de 6 días, aínda que se xustifique a falta.

En ningún caso se permitirá que un equipo solicite unha instalación deportiva e posteriormente non veña a adestrar como tal, senón que se faga de forma individual por parte dos/as xogadores/as. Isto será considerado un caso de infrautilización da instalación e dará lugar á perda do dereito a utilizar da instalación nesas horas para o resto da tempada.

- i. A entidade non poderá transferir total ou parcialmente a terceiros alleos á mesma, os usos concedidos nin desenvolver unha actividade distinta á que describiu na súa solicitude de participación na presente convocatoria; salvo que para isto último conte con autorización expresa do Concello.
- j. Non estará permitida a venda de mercadorías, *merchandising*, nin calquera outro tipo de transacción económica ou comercial, salvo solicitude e autorización expresa en contrario. Se se detectase que se percibiron retribucións por tales actividades incoaráselle o correspondente expediente contradictorio por incumprimento de condicións.
- k. O control de accesos levarase a cabo con persoal municipal, quedando terminantemente prohibido que ningún membro da entidade beneficiaria do uso dea ordes ao devandito persoal. No caso de que se prevea para un determinado partido unha afluencia de público especial ou calquera outra circunstancia extraordinaria, a entidade comunicará por escrito á Concellaría de Deportes cunha antelación de dous días para que se poidan adoptar as medidas pertinentes; de non facelo así a entidade beneficiaria asumirá todas as consecuencias que se poidan derivar da falta de comunicación. Porén, se pola importancia do evento fose necesario, segundo informe motivado do técnico municipal responsable da instalación, establécense uns servizos de vixilancia ou doutro tipo necesarios para garantir a boa orde do evento. A entidade solicitante deberá sufragar o custo dos mesmos. Con todo, tales servizos deberán axustarse ao protocolo de funcionamento das instalacións deportivas para espectáculos deportivos e ao disposto



Concello da Coruña

pola Lei 3/2012 do deporte en Galicia e a Lei de espectáculos e actividades recreativas de Galicia.

- l. As entidades usuarias da instalación deberán cumprir as indicacións que lles sexan proporcionadas polo servizo de conserxerías municipal de forma incuestionable. Especialmente as reflectidas nas normas de uso da instalación.
- m. É obrigatoria a asistencia das persoas adestradoras, delegadas ou directivas, maiores de idade, durante o desenvolvemento do adestramento, uso das salas, ximnasia e no uso dos vestiarios. En ningún caso poderá delegarse en deportistas ou nunha terceira persoa.
- n. No caso de cambios nos datos da solicitude, as entidades terán que comunicalo á Concellaría de Deportes.
- o. As entidades beneficiarias e persoas asumirán os danos que se ocasionen aos bens municipais.
- p. A Concellaría de Deportes non se fai responsable dos accidentes e lesións, así como posibles roubos dentro das instalacións.
- q. Todas as persoas usuarias das actividades desenvolvidas polas entidades beneficiarias deberán ter garantida a asistencia sanitaria polo que deberán presentar ante a Concellaría de Deportes, xunto coa súa solicitude, un seguro de accidentes con cobertura sanitaria ou no seu caso, a xustificación de que se conta con licenza federativa.

No suposto de que non se presente esta documentación perderase o dereito ao uso da instalación mediante resolución motivada.

- r. Toda as entidades respectarán escrupulosamente os horarios adxudicados e deberán comezar o seus adestramentos e partidos puntualmente. Se un partido comeza cun retraso de máis de 15 minutos poderá suspenderse polo persoal responsable da instalación da Concellaría de Deportes.
- s. As entidades ás que se lles asignen usos deberán:
 - Facilitar a colaboración de xogadores/as e/ou técnicos/as para actos puntuais de promoción deportiva ou eventos deportivos, que lles sexa solicitada pola Concellaría de Deportes motivada por interese da cidade.
 - Prestar a colaboración organizativa posible en todos aqueles actos dentro do ámbito da súa propia competencia que sexan organizados en exclusiva polo Concello da Coruña.
 - O palco de presidencia de todas aquelas instalacións deportivas obxecto da presente convocatoria será presidido pola alcaldesa da cidade da Coruña ou persoa en quen delegue, que poderá cursar as invitacións oportunas ata un máximo do 50% da súa capacidade, correspondendo o resto á entidade beneficiaria do uso da devandita instalación.
 - Indicar en toda a publicidade da entidade o logo do Concello da Coruña e colocar publicidade do Concello durante a celebración dos seus eventos deportivos. A publicidade do concello será a predominante a nivel institucional.



Concello da Coruña

- Limitarse unicamente á exhibición da publicidade dos seus patrocinadores durante o desenvolvemento da competición, sendo da súa conta e risco, a colocación, retirada e almacenamento dos elementos e soportes que usen para iso. Os elementos publicitarios deben ser desmontables. No caso de que se deteriore a instalación colocando este tipo de elementos, deberase reparar a instalación a cargo do club ou entidade.

11. EFECTOS DO INCUMPRIMENTO DAS NORMAS DE USO

Constatado documentalmente pola Concellaría de Deportes o incumprimento de calquera das normas de uso da instalación, trasladaráselle por escrito á entidade para que formule as alegacións e presente as probas correspondentes en defensa das súas pretensións. Instruído o correspondente procedemento, ditarase a resolución administrativa que corresponda.

No suposto de non serlle imputable á entidade darase orde de arquivo, e no caso de existir responsabilidade da entidade resolverase con:

- a. Apercibimento á entidade se non ten precedente algún na condición incumplida.
- b. Se ten precedente de incumprimentos, sancionarse co seguinte procedemento:
 - Falta leve: neste caso sancionarse a persoa ou equipo responsable do incumprimento a 1 semana sen acceso a adestramentos ou competicións nas instalacións deportivas municipais.
 - Falta grave: esta falta resulta de incorrer 3 2 veces nunha falta leve. Neste caso sancionarse a persoa ou equipo responsable do incumprimento a 4 semanas sen acceso a adestramentos ou competición nas instalacións deportivas municipais.
 - Falta moi grave: esta falta resulta de incorrer de novo noutro incumprimento. A sanción a aplicar será a expulsión do equipo ou persoa polo que resta da tempada deportiva.

DISPOSICIÓN ADICIONAL PRIMEIRA. Condicións específicas para acceder á pista de atletismo e campo de herba natural do Estadio de Elviña da UDC

- a. As persoas deportistas que accedan deberán estar en posesión de licencia federativa en vigor ou dispoñer dun seguro de accidentes deportivos específico. Ademais deberá acreditarse que toman parte, de xeito regular, nas competicións oficiais convocadas polas respectivas federacións deportivas, nas modalidades de atletismo (pista e saltos), fútbol e rugby.
- b. As persoas deportistas menores de idade, encadradas na modalidade de escola deportiva ou de promoción, así como os participantes aspirantes ou en período de proba, dispoñerán igualmente de licencia federativa en vigor ou, no seu caso, de seguro de accidentes deportivos específico.
- c. Nos supostos de persoas deportistas pertencentes a clubs, entidades e/ou agrupacións deportivas que non toman parte das modalidades de pista e o fagan noutras especialidades atléticas ou deportivas, serán tratados de xeito individualizado, previa solicitude motivada do club, entidade ou agrupación deportiva afectada.
- d. As persoas deportistas que utilicen as instalacións da UDC deberán atender a Normativa de uso das instalacións deportivas, Escolas Deportivas Municipais e outras actividades



Concello da Coruña

aprobadas en Xunta de Goberno Local o 20 de xullo de 2007 e a fixada pola propia UDC.

DISPOSICIÓN ADICIONAL SEGUNDA. Uso das instalacións deportivas na fin de semana

- a. O uso das instalacións deportivas municipais obxecto da presente convocatoria quedarán reservadas ás fins de semana e días festivos para as competicións deportivas, exceptuando determinadas instalacións onde se ofertan horas en sábado e domingo. Agás que, de xeito excepcional e motivado, se destinen para outros usos.
- b. Para acceder ao uso dunha instalación deportiva con fins competitivos, a reserva solicitada deberá ser comunicada antes dos xoves pola federación correspondente, ou no seu caso, polo club por delegación da primeira. En dita solicitude será obrigatorio achegar o calendario oficial de competicións ou no seu defecto documento federativo acreditativo da data e hora para o uso de competición. Calquera solicitude enviada despois dese prazo non será atendida.
- c. Naqueles casos onde haxa unha coincidencia de solicitudes de horas e instalación, resolverase seguindo o seguinte orde de preferencia:
 - 1) Que un dos clubs como mínimo sexa unha entidade con sede social na cidade da Coruña.
 - 2) O nivel de competición.
 - 3) Se estivesen ao mesmo nivel, daráselle preferencia ao club locatario de maior antigüidade de fundación.

DISPOSICIÓN ADICIONAL TERCEIRA. Tratamento de datos de carácter persoal

Os datos persoais facilitados polas persoas solicitantes serán tratados polo Concello da Coruña en calidade de Responsable de Tratamento con enderezo en María Pita, 1, 15001 A Coruña, coa finalidade de xestionar a prescrición, o rexistro e o desenvolvemento dos usos das instalacións deportivas municipais. A lexitimación para o tratamento dos datos persoais baséase na necesidade do cumprimento dunha misión realizada en interese público ou no exercicio dos poderes públicos conferidos á persoa responsable do tratamento. O Concello conservará os datos durante o tempo que sexa necesario para cumprir coa finalidade para a que se solicitaron e para determinar as posibles responsabilidades que se poidan derivar da finalidade exposta e do tratamento dos datos. Será de aplicación o disposto na normativa de arquivos e documentación. En calquera caso, os datos pódense conservar, se for o caso, con fins de arquivo de interese público, investigación científica e histórica ou fins estatísticos. Os datos comunicaranse a asociacións e organizacións sen ánimo de lucro, entidades aseguradoras, outros órganos da Administración local e profesionais ou entidades adxudicatarias da prestación do servizo.

Poderanse exercer os dereitos de acceso, rectificación, oposición, supresión, limitación do tratamento así como a portabilidade de datos, presentando un escrito no Rexistro de Entrada do Concello: Praza de María Pita, 1. 15001, A Coruña ou, na seguinte ligazón <https://www.coruna.gal/web/es/detalle/ejercicio-de-derechos-sobre-los-datos-de-caracterpersonal/contenido/1453762232714>. De ser o caso, poderá poñerse tamén en contacto coa persoa Delegada de Protección de Datos delegadodeprotecciondedatos@coruna.gal

Pódese consultar a información adicional detallada sobre o tratamento de datos na seguinte ligazón: <https://www.coruna.gal/web/gl/rgpd>



Concello da Coruña

A Concellaría de Deportes resérvase a facultade de interpretar e valorar as circunstancias conconrentes en cada caso.

DISPOSICIÓN TRANSITORIA ÚNICA

No suposto de que o día 31 de agosto de 2026 non houberse resolución definitiva da distribución de uso das instalacións, as entidades que participen na presente convocatoria manterán con carácter provisional os horarios de uso concedidos na actualidade ata que se dite a resolución definitiva da nova distribución das instalacións.

A resolución da presente convocatoria levará consigo a revogación de calquera ocupación de instalación que sexa contraria á mesma.

Esta convocatoria poderá prorrogarse nas mesmas condicións para as vindeiras tempadas.



Concello da Coruña

ANEXO I. OFERTA DE INSTALACIÓNS DEPORTIVAS MUNICIPAIS 2026-27

ESPAZO	DÍAS SEMANA	FRANXA HORARIA
AULA PALACIO DOS DEPORTES DE RIAZOR	LUNS A VENRES	08:00 A 00:00
CAMPO DE ELVIÑA (UDC)	LUNS A VENRES	08:00 A 21:30
CAMPO DE FÚTBOL EIRÍS (MEDIO CAMPO 1)	LUNS A VENRES	16:00 A 23:30
CAMPO DE FÚTBOL EIRÍS (MEDIO CAMPO 2)	LUNS A VENRES	16:00 A 23:30
CAMPO DE FÚTBOL Nº 1 CD TORRE ARSENIO IGLESIAS (MEDIO CAMPO 1)	LUNS A VENRES	08:00 A 00:00
CAMPO DE FÚTBOL Nº 1 CD TORRE ARSENIO IGLESIAS (MEDIO CAMPO 2)	LUNS A VENRES	08:00 A 00:00
CAMPO DE FÚTBOL Nº 1 SAN PEDRO DE VISMA (MEDIO CAMPO 1)	LUNS A VENRES	16:00 A 23:30
CAMPO DE FÚTBOL Nº 1 SAN PEDRO DE VISMA (MEDIO CAMPO 2)	LUNS A VENRES	16:00 A 23:30
CAMPO DE FÚTBOL Nº 2 SAN PEDRO DE VISMA (MEDIO CAMPO 1)	LUNS A VENRES	16:00 A 23:30
CAMPO DE FÚTBOL Nº 2 SAN PEDRO DE VISMA (MEDIO CAMPO 2)	LUNS A VENRES	16:00 A 23:30
CAMPO DE FÚTBOL Nº 2 CD TORRE ARSENIO IGLESIAS (MEDIO CAMPO 1)	LUNS A VENRES	08:00 A 00:00
CAMPO DE FÚTBOL Nº 2 CD TORRE ARSENIO IGLESIAS (MEDIO CAMPO 2)	LUNS A VENRES	08:00 A 00:00
CAMPO DE FÚTBOL Nº 3 CD TORRE ARSENIO IGLESIAS (MEDIO CAMPO 1)	LUNS A VENRES	08:00 A 00:00
CAMPO DE FÚTBOL Nº 3 CD TORRE ARSENIO IGLESIAS (MEDIO CAMPO 1)	LUNS A VENRES	08:00 A 00:00
CAMPO DE FÚTBOL Nº 4 CD TORRE ARSENIO IGLESIAS (MEDIO CAMPO 1)	LUNS A VENRES	08:00 A 00:00
CAMPO DE FÚTBOL Nº 4 CD TORRE ARSENIO IGLESIAS (MEDIO CAMPO 1)	LUNS A VENRES	08:00 A 00:00
CAMPO DE FÚTBOL Nº 5 CD TORRE ARSENIO IGLESIAS	LUNS A VENRES	08:00 A 00:00
CAMPO DE FÚTBOL RODRIGO GARCÍA VIZOSO (MEDIO CAMPO 1)	LUNS A VENRES	16:00 A 23:30
CAMPO DE FÚTBOL RODRIGO GARCÍA VIZOSO (MEDIO CAMPO 2)	LUNS A VENRES	16:00 A 23:30
CAMPO DE FÚTBOL VÍCTOR FERNÁNDEZ ALONSO (MEDIO CAMPO 1)	LUNS A VENRES	16:00 A 23:30
CAMPO DE FÚTBOL VÍCTOR FERNÁNDEZ ALONSO (MEDIO CAMPO 2)	LUNS A VENRES	16:00 A 23:30
CENTRO DE ESGRIMA CASA DA AUGA	LUNS A DOMINGO	10:00 A 14:00 16:00 A 22:00
CENTRO DE HALTEROFILIA CASA DA AUGA	LUNS A DOMINGO	
FRONTÓN CD A TORRE ARSENIO IGLESIAS	LUNS A DOMINGO	08:00 A 00:00
PISCINA RIAZOR	LUNS A VENRES	08:00 A 00:00
PISTA ATLETISMO RIAZOR	LUNS A VENRES	08:00 A 00:00
PISTA DE ATLETISMO ELVIÑA (UDC)	LUNS A VENRES	08:00 A 21:30
PISTA CENTRAL PALACIO DOS DEPORTES DE RIAZOR	LUNS A DOMINGO	08:00 A 00:00
PISTA POLIDEPORTIVO BARRIO DAS FLORES	LUNS A VENRES	08:30 A 00:00
PISTA POLIDEPORTIVO NORMAL (UDC)	LUNS A VENRES	16:00 A 21:30
PISTA POLIDEPORTIVO IES RAFAEL PUGA RAMÓN (DEPUTACIÓN)	LUNS A VENRES	18:30 A 00:00
PISTA POLIDEPORTIVO IES ROSALIA MERA (DEPUTACIÓN)	LUNS A VENRES	19:00 A 00:00
PISTA POLIDEPORTIVO LABAÑOU	LUNS A VENRES	16:00 A 00:00
PISTA POLIDEPORTIVO NOVO MESOIRO	LUNS A VENRES	08:30 A 00:00
PISTA POLIDEPORTIVO OS ROSALES	LUNS A VENRES	18:00 A 00:00
PISTA POLIDEPORTIVO SAGRADA FAMILIA	LUNS A VENRES	18:00 A 00:00
PISTA POLIDEPORTIVO SAN FRANCISCO JAVIER	LUNS A VENRES	18:00 A 00:00
PISTA POLIDEPORTIVO VENTORRILLO	LUNS A VENRES	18:00 A 00:00
POLIDEPORTIVA Nº 1 RIAZOR	LUNS A VENRES	08:30 A 00:00
POLIDEPORTIVA Nº 2 RIAZOR	LUNS A VENRES	08:30 A 00:00



Concello da Coruña

ESPAZO	DÍAS SEMANA	FRANXA HORARIA
POLIDEPORTIVO MULTIUSOS RIAZOR	LUNS A VENRES	08:00 A 00:00
PISTA DE PATINAXE DURMIDEIRAS	LUNS A VENRES	08:00 A 00:00
PISTA DE PATINAXE NOVO MESOIRO	LUNS A VENRES	08:00 A 00:00
SALA C MUSCULACIÓN PALACIO DOS DEPORTES DE RIAZOR	LUNS A VENRES	08:00 A 00:00
SALA DE BOXEO PALACIO DOS DEPORTES DE RIAZOR	LUNS A VENRES	08:00 A 00:00
SALA DE MUSCULACIÓN FRONTÓN DE RIAZOR	LUNS A VENRES	08:00 A 00:00
XIMNASIO A PALACIO DOS DEPORTES DE RIAZOR	LUNS A VENRES	08:00 A 00:00
SALA DE MUSCULACIÓN FRONTÓN DE RIAZOR	LUNS A VENRES	08:00 A 00:00
XIMNASIO B TATAMI PALACIO DOS DEPORTES DE RIAZOR	LUNS A VENRES	08:00 A 00:00
XIMNASIO C PALACIO DOS DEPORTES DE RIAZOR	LUNS A VENRES	08:00 A 00:00
XIMNASIO FRONTÓN TORRE	LUNS A VENRES	08:00 A 00:00
XIMNASIO POLIDEPORTIVO BARRIO DAS FLORES	LUNS A VENRES	08:30 A 00:00
XIMNASIO POLIDEPORTIVO OS ROSALES	LUNS A VENRES	18:00 A 00:00
XIMNASIO POLIDEPORTIVO SAGRADA FAMILIA	LUNS A VENRES	18:00 A 00:00
XIMNASIO POLIDEPORTIVO SAN FRANCISCO JAVIER	LUNS A VENRES	18:00 A 00:00

Director da Área de Deportes